

IMPRESIONANTE ANOCHI DI MARIACHI DEDICA NA BUBU "EL GENERAL" BISLICK..

Foto/texto :Poets

DEN AMBIENTE

**** Impresionante tabata e anochi di mariachi dedica na e gran cantante di tur tempo di musica ranchera, BUBU "EL GENERAL" BISLICK. E bunita anochi di mariachi aki a tuma lugar den City One y a ser transmiti enbibo pa TOP 95 Fm.**

For di momento cu Bubu a yega City One den e Ford antiguo di Tony Bosch, el a ser bombardea cu serenatanan dedica na su persona cual tabata uno tras di otro te na final. E anochi aki a ser anima pa Percy Jeand'or, kende a realiza un bon trabao. E promenan cu a brinda Bubu un tremendo serenata tabata Trio Los Arubefios, kendenan a sorprende un i tur cu nan fantastico repertorio di musica ranchera. Despues a sigui Mariachi Aruba kendenan a duna un magnifico presentacion.

E fantastico duo for di Boneiro, Mamita y Calixto, a percura pa pone e cherry riba e bolo y brinda e publico presente un fabuloso presentacion, presentando nan hitnan for di nan exitoso CD "Amor es Amar. E duo aki a impresionar Bubu asina tanto, cu hasta Bubu a canta un cancion cu Mamita den duo.

Mariachi Lirios del Campo a subi dos biaha riba escenario, cual segun programa e prome parti tabata nan show y e segundo parti lo mester

tabata completamente dirigi na Bubu. Pero durante nan prome parti, ya caba Vicente Tromp a snoek Bubu cu e cancion "El General" cu a pone cu Bubu no por a contene su emocion y a subi riba escenario pa interpreta e cancion cu a hasie tan popular, cual sigur a conmove tur hende den sala.

Durante e anochi aki, Bubu a haya hopi sorpresanan agradable cu hamas e por bay lubida. Un di e sorpresanan tabata presencia di e tremendo duo Marcelino Paesch y Yolanda v/d Linde, kendenan a cumpli cu e deseo di un grabacion riba cassette di nan produccion cu nan a realiza na Hulanda, cual grabacion semper tabata e deseo di Bubu. Tambe e bunita serenata cu e dos rumannan Bertha y Aileen a brinda Bubu, a trese hopi alegria den curason di Bubu Bislick.


Na momento cu Bubu Bislick a ricibi su plakaat como recuerdo di e anochi inolvidable aki for di man di DEN AMBIENTE, e no por a contene su lagrimanan di alegria.

Na final di e anochi maravioso aki, tur esnan presente a demostra nan satisfecho y a expresa nan palabranan di gratitud y pa por tin mas di e anochi nan aki.

Sin duda algun e anochi aki tabata uno vale la pena dedica na Bubu "El General" Bislick.



**** Bubu Bislick sumamente emocionada cu su plakaat den man, flanqueada pa Bertha Wolff, Aileen Croes, Vicente Tromp y Percy Jeand'or..**



**** E duo Marcelino y Yolanda brindando Bubu su serenata..**



**** E yiu muher di Bubu, Brenda Bislick tambe a brinda su querido tata un bunita serenata..**




**** Manera un berdadero GENERAL Bubu Bislick a ser transporta den e Ford antiguo maneha pa Sub General Edwin Geerman..**



**** Bubu interpretando e cancion "El General" acompaña pa Mariachi Lirios del Campo..**



**** Mamita y Calixto durante nan tremendo presentacion..**



**** E rumannan Bertha y Aileen durante nan bunita serenata dedica na Bubu..**